

Date – 12/11/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Dec ni 3-a Lai Autonomous District Council inthlanpui neihtur ah vawiin khan Zoram Peoples' Movement Party, Mizo National Front leh Indian National Congress ten an Candidate tur an puang.
2. Dampa bial bye- election nimina vote thlakna khawl EVM leh document pawimawh te chu strong room ah venhimna khauh tak hnuaiyah dah that a ni tawh.
3. Prime Minister Narendra Modia chuan hlawhtling taka Bhutan a tlawh hnuah vawiin khan New Delhi a lo thleng
4. President Draupadi Murmu leh Bostwana President Duma Bokote te chu vawiin khan Gaborone ah an inkawm

<><><>

LADC CANDIDATE

Dec ni 3-a Lai Autonomous District Council inthlanpui neihtur ah vawiin khan Zoram Peoples' Movement Party, Mizo National Front leh Indian National Congress ten an Candidate tur an puang.

ZPM chuan Aizawl a an party office ah LADC a an Candidate turte puangin bial awm zawng zawng 25 chuhkim an tum a, ZPM, MDC nilai pathum chu Candidate tur zingah an tel lova, an zing ah Paithar bialtu MDC, CEM lo ni tawh Pu V.Zirsanga chu a langsar ber niin, Cheural bial leh Bungtlang South bialah pawh ZPM, MDC nilai te hnawl an ni a, ZPM hian an MDC nilai paruk chu an bial ngai theuh a ding turin an ti a ni.

Pu Lalliansawta chuan ruahmanna hmasaah chuan Lawngtlaiah ngei candidate hming puan an tum a, amaherawhchu inthlan hun puan thut anih avang leh eng eng emaw avangin Aizawl-ah an puang ta tih sawiin, candidate thlang tur hian a hmuna awmte atangin mi 8 awmna Search Committee an din a, kum tir atang khan candidate atana tha tur uluk taka zirin ngaihtuahna an lo seng tawh a ti.

Pu Lalliansawta chuan LADC-a bial 25-ah hian din tum leh inbeisei mi 116 zet an awm a ti a, bial pakhatah mi pakhat chauh zel thlan a ngaih avangin bial chang ve ta lo an awm lo thei lo tih sawiin, Lai mipuite leh ZPM tan tang tlang a, theih tawp chhuah zel turin a sawm a, state sorkar tha taka thawhpui thei tur leh LADC nghet tha tak din turin an beisei tih a sawi bawka a ni.

Byte: ZPM Gen.Hqrs President Pu Lalliansawta

He hunah hian Minister Pu PC Vanlalruata pawhin thusawiin, tawngtaina nen Pathian rawn chung a uluk taka an chhawp chhuah takte chu an ring taw a ti a, ZPM party chuan tunhmaa la hmuh ngai loh sorkar tha leh ngelnghet tak Lairam mipuite pek an tum tih sawiin, Lawngtlai District mipuite chu rilru fim tak pu tur leh sorkar tha tak dinpui turin a sawm a ni.

Byte: Minister PC Vanlalruata

MNF Party chuan bial 20 a an Candidate turte vawiin vek khan Aizawl a an party office ah an puanga, LADC a MNF in MDC an neihlai mi 11 te chu an bial ngai theuh ah an ding dawn a, Pu Lalthanmawia Colney MDC (Nominated) chu Lawngtlai AOC biala ding tura tih a ni bawk.

Byte: Pu Zoramthanga

Hetihlai hian MDC Bial 5- Sangau East, Sangau West, Paithar, M Kawnpui, leh Sekulh ah te an la puang lo thung a, Pu Zoramthanga chuan heng biala ding tur te chu a remchan dan anga an la puan tur thu a sawi a ni.

Congress Party chuan Lawngtlai Bazar Veng a an Party Office ah an puang a, MPCC Vice President Pu Ngunlianchunga'n a thawhkhat nan Bial 25 awmna LADC ah bial 10-a an Candidate tur puangin, tun Sorkar Term kallaia CEM pawh ni tawh Pu C.Lalmuanthanga chu a bial ngai, South Lungpher a ding tura tih a ni a, naktuk lamah bial danga an Candidate turte puan chhonzawm an tum a ni.

Lawngtlai West bialtu MLA Pu Ngunlianchunga chuan LADC ah Congress an Sorkarloh apiangin Sorkar a kal mumal thei thin lova, mipuiin Congress ah rinna an nghat nasa a ti a, LADC inthlanpui ah Sorkar na an siam ngei a beisei thu a sawi.

<><><>

DAMPA BY-POLL

Dampa bial bye- election nimina vote thlak a nih hnuah, polling party leh EVM ten tukin khan Mamit an thleng fel tawh a, EVM leh document pawimawh te chu strong room ah venhimna khauh tak hnuaiyah dah that a ni.

Polling party te hian buaina leh harsatna awmlovin tuang takin Mamit an thleng a, Kawnmawi polling party te chu thleng hma ber niin nizan dar 7 leh 57 khan an thleng a, Silsuri 1 polling party te chu thleng hnuhnung ber niin tukin dar 5 vel khan an thleng thung a ni.

Vote tla zat hi zaa 83.07 a ni a, mipa vote 8921 leh Hmeichhia vote 8430 atla a , Dampa bial pumpuiaah vote 20888 awmah vote hi 17351 a tla a ni.

Hruiduk polling station ah vote tla tha berin zaa 93.09 a tla a, Kea kal ngai Zopui ah chuan vote 29 awmah chawhma chhungin vote 22 a tla hman veka, zaa 75.86 niin vote tlak chhiatna ber a ni thung.

Marpara North polling station ah vote thlak rei berna niin nizan dar 8 leh minute 20 vel thleng khan vote an thlak a ni.

Dampa bial bye election ah hian home voting kum upa 58, pwd 5 an vaiin mi 63, EDC mi 7 leh postal ballot mi 10 ten vote an thlak bawk.

Dampa bial bye election vote tla te hi State dang inthlang ve tho te vote chhiar rualin naktip ni 14 ah Mamit DC conference hall ah chhiar a ni ang a, Vote chhiarna tur hian dawhkan 9 ruahman a ni.

Dampa Assembly bial Bye-Election neih zawh taka vote tlate hi vawiin khan General Observer Pu M.T Reju, IAS hovin Pu Malsawmzuala, Returning Officer room-ah neih a ni.

Returning Officer chuan Dampa bial Bye-Election neih zawh takah Election Commission of India-in ruahmanna a siamsa dungzuia endikna neih a nih thu leh nimin Dampa bial Bye-Election inthlanna neih zawh taka complain lut a awm loh thu a sawi a, Bawlte Polling Station-a VVPAT thlak ngai awm chu thlak a nih hnuah inthlanna tluang taka kalpui zui leh a nih thu a tarlang a ni.

General Observer chuan felfai leh thianghlim taka inthlanna kalpui a ni chu lawmawm a tih thu a sawi bawk.

<><><>

LAWNGTLAI

Lawngtlai District chhung, Kakichhuah ah Tuihri ni a hriat leng mek vangin tukin khan Rawlthar kum 14 a thi a, hriattheih chinah Hrileng vang a thi zat hi panga an tling tawh.

Kakichhuah a Hrileng vang hian Lawngtlai District Magistrate Pu Donny Lalruatsanga chuan Kakichhuah chu tlawhpawh theihloh tura kharkhipna thupek vawiin khan a chhuah a, mipui chiailo tur leh damdawi lam thiamte thurawn ngaipawimawh turin a ti.

Vawiin khan Lawngtlai Bawrsap Pu Donny Lalruatsanga leh Chief Medical Officer Dr.Lalmuanawma Jongte te chuan Kakichhuaha Hrileng chungchang hi sawidunin, CMO chuan tun dinhmun ah he hri kai ni a hriat damlo 27 an awm tih a sawi a, Rapid Response Team din niin an thutchilh thu leh Medical Team ten Sample an lak te pawh ZMC&H ah enfiah tura thawn a nih thu Bawrsap hi a hrilh.

Kan corr report lo ngaithla ang.

VC

Kakichhuah a Hrileng vang hian Lawngtlai Dist Chief Medical Officer, Dr.Lalmuanawma Jongte chuan thuchhuah siamin, Hri hi Myanmar ram chhung, Salachhuah atanga rawnlut ni a an hriatthu leh mipui lam chu Damdawi thiamte thurawn ngaipawimawh tura a duh thu a sawi a, hri kai theihna leh darh theihna lakah mithiamte thurawn zawm tura a duh thu a tarlang.

Hetihlai hian, Young Lai Association, New Kakichhuah Branch pawn thuchhuah siamin, an khua atangin zinchhuah an khap a, Damdawi lam thiam leh an harsatna buaipuitu tur nilo chu tumah an khua a lutlo turin an ti bawk.

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.



PM

Prime Minister Narendra Modia chuan hlawhtling taka Bhutan a tlawh hnuah vawiin khan New Delhi a lo thleng. Bhutan-a a cham chhung hian PM Modia hian Bhutan lal leh Fourth Druk Gyalpa te nen Kalachakra, Wheel of Time Empowerment Ceremony an hawng a. PM Modia chuan social media ah Kalachakra Empowerment chu Buddhist sakhaw hun paiwmawh tak anih thu tarlangin Global Peace Prayer Festival pawimawh tak zinga peng pakhat a nih thu a sawi a. Khawvel hmun hrang hrang atangin Buddhist mithiam leh sakhaw mite an fuankhawm tih a tarlang a ni.



PRESIDENT

President Draupadi Murmu leh Bostwana President Duma Bokote te chu vawiin khan Gaborone ah an inkawm a. Ram pahnih inlaichinnate zau takin an sawi dun rin a ni. Sumdawnna leh sum peipunna lamte, technology, energy, agriculture, health, pharmaceurtical, defence leh mipuite inpawhna tura hmalakna te an sawidun a. Health leh pharmaceuticals lama thawhdunna tur inremna thuthlung pahnih vawiin tlai khan ziah a ni bawk.

President Murmu-i hian nizan khan Bostwana khawpui hi a thleng a. Hlawhtling takin Angola a lo tlawh tawh bawk a ni.



PM VISIT HOSPITAL

Prime Minister Narendra Modia chuan Thawhtan zana Delhi-a car puak avanga hliam tuar enkawl mekte Lok Nayak Jai Prakash Narayan Hospital-ah vawiin khan a tlawh. PM hian Bhutan atanga Delhi alo thlen veleh damdawiin hi a pan nghal a. Hliam tur enkawl mekte nen inkawmin an dam thuai theih nan duhsakna a hlan a. Offical leh doctor ten hliam enkawlte dinhmun an lo hrilhfiyah bawk a ni. Pu Modia chuan he pawikhawihnaa mawhphurtute chu hrem ngei an ni ang tih social media ah a tarlang a ni.

